



REPUBLIKA E SHQIPËRISË
MINISTRIA E INFRASHTRUKTURËS DHE ENERGJISË
SHËRBIMI GJEOLGJIK SHQIPTAR
DREJTORIA E FINANCËS DHE SHËRBIMEVE MBËSHTETËSE

Nr. 805 Prot.

Tiranë, më 13.06. 2022

URDHËR

Nr. 11, datë 13/06/2022

PËR

“MIRATIMIN E KODIT TË ETIKËS SË SHËRBIMIT GJEOLGJIK SHQIPTAR”

Në mbështetje të pikës 4, të nenit 102, të Kushtetutës së Republikës së Shqipërisë, të Ligjit Nr. 9131, datë 08.09.2003 “Për rregullat e etikës në administratën publike”, të Ligjit Nr. 111, datë 15.10.2015 “Për Shërbimin Gjeologjik Shqiptar” dhe Vendimit të Këshillit të Ministrave nr. 874, datë 29.09.2021 “Për miratimin e rregullave për zbatimin e parimeve të etikës, të klasifikimit të veprimtarive të jashtme dhe vlerën e dhuratave, që mund të administrohen gjatë veprimtarisë së nëpunësit të administratës publike”

URDHËROJ:

1. Miratimin e Kodit të Etikës së Shërbimit Gjeologjik Shqiptar, që i bashkëlidhet këtij urdhri dhe është pjesë përbërëse e tij.
2. Ngarkohen punonjësit/nëpunësit e Shërbimit Gjeologjik Shqiptar për zbatimin e këtij urdhëri.

Ky urdhër hyn në fuqi menjëherë.

DREJTORI I PËRGJITHSHËM

Dr. Viktor Doda



KODI ETIK I SHËRBIMIT GJEOLGJIK SHQIPTAR

KREU I FUSHA E ZBATIMIT DHE PARIME TË PËRGJITHSHME

Neni 1 Qëllimi

Kodi i Etikës (në vijim Kodi) ka për qëllim të përcaktojë rregullat e sjelljes, të përshkruajë parimet e përgjithshme që punonjësit e Shërbimit Gjeologjik Shqiptar duhet të ndjekin në mënyrë që të garantojnë integritet, profesionalizëm, paanshmëri dhe pavarësi në ushtrimin e detyrave të tyre, klasifikimin e vepimtarive të jashtme dhe të lejueshme, si dhe trajtimin dhe administrimin e dhuratave.

Neni 2 Fusha e veprimit

1. Dispozitat e këtij Kodi janë të detyrueshme për kategoritë e mëposhtme:
 - a. Drejtorin e Përgjithshëm të Shërbimit Gjeologjik Shqiptar;
 - b. Nëpunësit civil/Punonjësit/Praktikantët e Shërbimit Gjeologjik Shqiptar;

Neni 3 Përkufizime

Në kuptim të këtij Kodi, termat e mëposhtëm kanë këto kuptime:

- a) Nëpunësit civil/Punonjësit/Praktikantët të parashikuar në nenin 2, pika b të këtij Kodi do të konsiderohen të gjithë kategoritë e punonjësve dhe praktikanteve të punësuar sipas legjislacionit në fuqi në Shërbimin Gjeologjik Shqiptar (me kohë të plotë ose të pjesshme);
- b) **“Epror direkt”** për:
 - i. nëpunësit civilë është eprori i caktuar si i tillë, në respektim të legjislacionit për nëpunësin civil;
 - ii. nëpunësit e tjerë jashtë shërbimit civil, është eprori i caktuar si i tillë në përshkrimet e punës, në respektim të legjislacionit në fuqi;
- c) **“Konflikt interesi”** dhe **“Interes privat”**, i njëjti kuptim sipas legjislacionit në fuqi në këtë fushë;
- d) **“Veprimtari e jashtme”**, i njëjti kuptim me atë të përcaktuar në Ligjin nr.9131, datë 8.9.2003, *“Për rregullat e etikës në administratën publike”*;
- dh) **“Dhurata”**, likuiditete në para në dorë, në llogari rrjedhëse, në depozitë, në bono thesari a në huadhënie, sende me vlerë dhe çdo send apo shërbim, me vlerë monetare, të premtuar, ofruar, dhënë falas ose nën vlerëne tregut, interesat, aksionet dhe pjesët e kapitalit në shoqëri tregtare, borxhet e detyrimet jozyrtare ndaj personave fizikë apo juridikë;
- e) **“Procedurë disiplinore”**, e gjithë veprimtaria administrative, që kryhet që nga momenti i konstatimit të një shkeljeje disiplinore, vënies në dijeni, me shkrim, të personit që pretendohet se ka kryer shkeljen, deri në marrjen e një vendimi përfundimtar nga organi disiplinor;
- f) **“Informacion konfidencial”**, informacioni që mund të aksesohet vetëm nga personat e

autorizuar sipas legjislacionit në fuqi për informacionin e klasifikuar, përhapja e të cilit mund t'i sjellë dëme sigurisë kombëtare, institucioneve/enteve publike etj.

Neni 4 Parimet

1. Punonjësit e Shërbimit Gjeologjik Shqiptar gjatë kryerjes së detyrave të tyre janë të detyruar të respektojnë dhe të veprojnë në përputhje me parimet themelore të Ligjit nr. 152/2013 “Për nëpunësin civil” i ndryshuar dhe Ligjit nr.9131, datë 8.9.2003 “Për Rregullat e Etikës në Administratën Publike”.
2. Gjatë kryerjes së detyrave të tyre, punonjësit e Shërbimit Gjeologjik Shqiptar ndër të tjera duhet të respektojnë parimet e mëposhtme:
 - a. **Ligjshmëria:** Kryen detyrat në përputhje me Kushtetutën dhe legjislacionin në fuqi.
 - b. **Përparësia e interesit publik:** Ruan dhe forcon besimin e publikut në Shërbimin Gjeologjik Shqiptar, duke paraqitur standardet më të larta të profesionalizmit, efikasitetit dhe efektivitetit gjatë ushtrimit të funksionit publik.
 - c. **Integriteti:** Merr vendimet e duhura dhe vepron vetëm në interes të shërbimit publik, pa marrë parasysh interesat private. Punonjësi duhet të veprojnë në përputhje me dispozitat e këtij Kodi dhe ligjit “Për parandalimin e konfliktit të interesave në ushtrimin e funksioneve publike”, i ndryshuar.
 - d. **Paanshmëria:** Merr vendime dhe vepron në mënyrë të drejtë dhe të paanshme, duke u bazuar vetëm në njohuritë dhe bindjen e tij profesionale gjatë trajtimit të praktikës administrative të cilën ka në ngarkim. Vepron në mënyrë të pavarur nga pikëpamjet e tij politike dhe nuk pengon zbatimin e politikave, vendimeve ose veprimeve juridike të autoriteteve të administratës publike.
 - e. **Mosdiskriminimi:** Shmang çdo sjellje dhe veprim diskriminues mbi gjininë, racën, ngjyrën, etninë, gjuhën, identitetin gjinor, orientimin seksual, bindjet politike, fetare ose filozofike, gjendjen ekonomike, arsimore ose shoqërore, shtatzaninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicione gjenetike, aftësinë e kufizuar apo përkatësinë në një grup të veçantë.
 - f. **Konfidencialiteti:** Ruan konfidencialitetin e informacionit publik që harton dhe disponon, por pa çenuar detyrimet që rrjedhin nga ligji “Për të Drejtën e Informimit”.
 - g. **Përgjegjshmëria:** Punonjësi duhet t'i shërbejë interesave dhe nevojave të ligjshme të Shërbimit Gjeologjik Shqiptar dhe qytetarëve, në kohën e duhur, me kujdes, respekt dhe përgjegjësi.

KREU II RREGULLAT PËR ZBATIMIN E PARIMEVE TË ETIKËS

Neni 5

Kryerja e detyrave në përputhje me legjislacionin në fuqi dhe në mënyrë të pavarur nga pikëpamja politike

Në respektim të parimit të kryerjes së detyrave në përputhje me legjislacionin në fuqi, në mënyrë të pavarur nga pikëpamja politike dhe të mospengimit të zbatimit të politikave, vendimeve ose veprimeve ligjore, punonjësi i Shërbimit Gjeologjik Shqiptar ka detyrimin të ndjekë dhe të zbatojë këto rregulla:

- a) Gjatë ushtrimit të detyrave funksionale, zbaton me korrektësi e bindje ligjin e politikave e

- përgjithshme shtetërore, respekton ndarjen e kompetencave, si dhe vepron në mbrojtje të interesit publik;
- b) Ushtron detyrat funksionale, duke garantuar të drejtat e liritë themelore të njeriut dhe trajtim të barabartë përpara ligjit, në përputhje me legjislacionin në fuqi;
 - c) Merr masat e nevojshme për parandalimin e veprimeve të paligjshme dhe ka detyrimin të informojë eprorët, si dhe të adresojë pranë autoriteteve kompetente çdo rast abuzimi, vjedhjeje, mashtrimi dhe korrupsioni, apo vepra të tjera, që mund të konstatojë gjatë ushtrimit të detyrës;
 - ç) Nëse dyshon se eprori ka dhënë një urdhër të paligjshëm, informon pa vonesë eprorin e personit që ka dhënë këtë urdhër dhe kërkon konfirmimin e tij me shkrim. Ai ka detyrimin të zbatojë urdhrin me shkrim, me përjashtim të rastit kur zbatimi i tij përbën vepër penale;
 - d) Në varësi të pozicionit të punës, punonjësi i Shërbimit Gjeologjik Shqiptar mund të jetë anëtar i partive politike apo i grupimeve me karakter politik, për aq sa lejohet me ligj;
 - dh) Punonjësi i Shërbimit Gjeologjik Shqiptar lejohet të marrë pjesë në grumbullime, takime, mbledhje, tubime me karakter politik apo të shprehë publikisht bindjet apo preferencat politike, për aq sa nuk bie ndesh me legjislacionin në fuqi.
 - e) Punonjësi i Shërbimit Gjeologjik Shqiptar distancohet qartazi nga çdo ndikim ose presion politik, që mund të çojnë në njëanshmëri gjatë përmbushjes së detyrave.

Neni 6

Kryerja e detyrave me ndershmëri, paanshmëri, efikasitet, ruajtja dhe rritja e besimit të publikut

1. Në respektim të parimit të kryerjes së detyrave me ndershmëri, paanshmëri, efikasitet, duke pasur parasysh vetëm interesin publik dhe me qëllim që sjellja e tij t'i shërbejë ruajtjes dhe rritjes së besimit të publikut në ndershmërinë, paanshmërinë dhe efektivitetin e shërbimit publik, punonjësi i Shërbimit Gjeologjik Shqiptar ka detyrimin të ndjekë dhe zbatojë këto rregulla:
 - a) Në çdo rast, vepron me integritet të lartë moral dhe profesional, në funksion të kryerjes së veprimtarisë administrative;
 - b) Sjellja personale duhet të jetë e tillë që të reflektojë ndershmëri, të promovojë vlerat e parimet më të larta etiko-morale dhe të inkurajojë punonjësit e tjerë të veprojnë në përputhje me këto vlera;
 - c) Duhet të jetë i paanshëm, i besueshëm, transparent, efektiv, duke realizuar me disiplinë dhe në kohë detyrat funksionale, në respektim të interesit publik;
 - ç) Përdor në mënyrë efektive kohën e punës për realizimin me përgjegjësi dhe korrektësi të detyrave funksionale, duke kontribuar në rritjen e performancës;
 - d) Gjatë ushtrimit të detyrës, punonjësi i Shërbimit Gjeologjik Shqiptar:
 - i. ndjek e zbaton parimin e deburokratizimit dhe të eficiencës, duke siguruar që procedura administrative të zhvillohet sa më shpejt të jetë e mundur, brenda afateve ligjore dhe me sa më pak kosto;
 - ii. jep mendime e opinione objektive, bazuar në dijeninë dhe në përvojën profesionale, duke garantuar paprekshmërinë e interesit publik e institucional, mbi atë personal.
 - dh) Punonjësi i Shërbimit Gjeologjik Shqiptar realizon në kohë dhe me përgjegjësi detyrat, duke mos hequr dorë nga kompetencat gjatë vendimmarrjes. Çdo vonesë në përmbushjen e detyrave duhet të jetë e arsyetuar.
 - e) Në përmbushje të detyrave funksionale, ndjek dhe përgatit çështjet që i janë ngarkuar sipas rëndësisë, prioriteteve dhe/ose rendit kronologjik;
 - ë) Punonjësi i Shërbimit Gjeologjik Shqiptar shqyrton me vëmendjen e duhur të gjitha kërkesat e individëve/subjekteve private/apo organe të tjera publike apo të huaja dhe

mundëson përgjigjet respektive ndaj tyre. Çështjet që punonjësi i Shërbimit Gjeologjik Shqiptar, në bashkëpunim me eprorin, i vlerëson jashtë kompetencës së vet, i përcjell pa vonesë tek institucioni kompetent, duke vënë në dijeni në çdo rast edhe kërkuesin.

Neni 7

Konflikti i interesit e respektimi i të drejtave dhe interesave personalë të të tretëve

Në respektim të parimit të moslejimit që interesat privatë të bien ndesh me pozitën e tij publike, shmangies së konfliktit të interesave, mosshfrytëzimit të pozitës për interesin privat, moskryerjes së veprimeve arbitrare e tregimit të respektit të duhur për të drejtat e interesat personalë të të tretëve, punonjësi i Shërbimit Gjeologjik Shqiptar ka detyrimin të ndjekë dhe zbatojë këto rregulla:

- a) Shmang çdo situatë të konfliktit të interesit gjatë përmbushjes së detyrave, deklaroi interesat privatë pranë autoritetit përgjegjës të institucionit dhe respekton dispozitat e legjislacionit për parandalimin e konfliktit të interesave në ushtrimin e funksioneve publike;
- b) Duhet të shmangë angazhimin në aktivitete që përbëjnë, mund të përbëjnë apo do të përbëjnë konflikt interesi të çdo lloji, sipas përcaktimeve të legjislacionit në fuqi për konfliktin e interesit;
- c) Duhet të shmangë situata, veprime dhe sjellje që dëmtojnë apo mund të dëmtojnë imazhin institucionit. Përbëjnë cenim të imazhit të institucionit, por pa u kufizuar në to:
 - i. shoqërimi me persona privatë, që mund të kenë interesa të lidhura me veprimtarinë e Shërbimit Gjeologjik Shqiptar, apo shoqërimi me persona privatë të përfshirë në aktivitete të paligjshme;
 - ii. kryerja e veprimeve të ekzagjeruara në bare, lokale, restorante, parqe dhe/apo ambiente të tjera publike;
 - iii. frekuentimi i ambienteve, aktiviteteve apo vendeve të padenja dhe që mund të dëmtojnë ose të hedhin dyshime mbi figurën e tij morale;
 - iv. përdorimi në mënyrë jokorrekte i medias dhe i rrjeteve sociale;
 - v. realizimi dhe publikimi në çfarëdolloj forme i fotove/videove të vetvetes, kolegëve, ambienteve të punës, proceseve të punës, për qëllime që nuk lidhen me punën apo me aktivitete zyrtare.
- ç) Në marrëdhëniet me publikun, gjatë një procedure administrative, punonjësi i Shërbimit Gjeologjik Shqiptar garanton respektimin dhe mbrojtjen e të drejtave të personave të përfshirë në të, në mënyrë sa më efektive. Informon palët mbi të drejtat e detyrimet e tyre dhe i paralajmëron ato për pasojat ligjore të veprimeve ose të mosveprimeve të tyre.

Neni 8

Përdorimi i informacionit zyrtar dhe ruajtja e konfidencialitetit të tij

1. Në respektim të parimit të ruajtjes së konfidencialitetit të informacionit që ka në zotërim dhe të përdorimit të këtij informacioni në përputhje me legjislacionin për të drejtën e informimit, punonjësi i Shërbimit Gjeologjik Shqiptar ka detyrimin të ndjekë dhe zbatojë këto rregulla:
 - a) Garanton dhënien e informacionit publikut, në përputhje me parashikimet e legjislacionit për të drejtën e informimit, për atë kohë sa ky informacion nuk është i ndaluar për t'u dhënë;
 - b) Ruan konfidencialitetin e informacionit që zotëron, por pa cenuar zbatimin e detyrimeve që rrjedhin nga legjislacioni që rregullon të drejtën e informimit mbi dokumentet zyrtare;
 - c) Nuk mund të përdorë për qëllime private informacionin që zotëron për shkak të detyrës;
 - ç) Mbron, ruan dhe nuk përhap informacionin zyrtar edhe pas largimit nga detyra, për një

- periudhë 2-vjeçare. Në rastet e informacionit konfidencial, afati përcaktohet sipas legjislacionit në fuqi;
- d) Publikimi dhe transmetimi, përmes mjeteve të ndryshme të komunikimit, i kujtimeve personale që lidhen me detyrën që ka ushtruar ose ushtron, duhet të jetë gjithnjë në përputhje me parimin e konfidencialitetit;
- dh) Nuk mund të shpërndajë apo të publikojë dokumentacionin zyrtar, pa autorizimin paraprak të eprorëve, me përjashtim të materialeve që publikohen në faqen elektronike, nëkuadër të programit të transparencës.
2. Punonjësi i Shërbimit Gjeologjik Shqiptar, nuk duhet të përfaqësojë asnjë person ose organizatë në një konflikt ose marrëdhënie tregtare me institucionin, për një periudhë kohe 2-vjeçare pas largimit nga detyra, për detyrën që ai ka kryer ose në vazhdimësi të saj.
 3. Në rast të fillimit të një detyre të re përgjatë një periudhe kohe të përcaktuar në pikën 2 të këtij neni, punonjësi i Shërbimit Gjeologjik Shqiptar duhet të informojë Drejtorinë e Financës dhe Shërbimeve, Sektori i Financës, Buxheti dhe Burimeve Njerëzore në Shërbimin Gjeologjik Shqiptar, minimalisht dy javë përpara fillimit të detyrës, për qëllimin e tij për t'u angazhuar në një marrëdhënie tjetër punësimi.
 4. Drejtoria e Financës dhe Shërbimeve, Sektori i Financës, Buxheti dhe Burimeve Njerëzore pranë Shërbimit Gjeologjik Shqiptar shqyrton informacionin e dhënë për të përcaktuar nëse natyra e veprimtarisë është apo jo në kushtet e përcaktuara në pikën 2, të këtij neni, dhe njofton me shkrim ish-punonjësin për vendimin e saj, brenda 5 (pesë) ditëve pune nga marrja e kërkesës nga ish-punonjësi.
 5. Nuk ka nevojë të raportohen veprimtaritë që kanë të bëjnë me:
 - a) aktivitete bamirësie ose humanitare;
 - b) aktivitetet që rrjedhin nga bindjet politike, sindikaliste dhe/ose filozofike ose fetare;
 - c) aktivitetet kulturore;
 - ç) menaxhimin e thjeshtë të aseteve apo zotërimeve apo pasurisë personale apo familjare, në cilësinë private;
 - d) veprimtarinë akademike;
 - dh) aktivitete të ngjashme.
 6. Për situata apo raste tepër të dyshimta dhe të patrajuara më parë Drejtoria e Financës dhe Shërbimeve, Sektori i Financës, Buxheti dhe Burimeve Njerëzore mund të kërkojë ndihmën e Departamentit të Administratës Publike.

Neni 9

Sjellja në marrëdhënie me qytetarët, eprorët, kolegët e vartësit

1. Në respektim të parimit të sjelljes etike në marrëdhënie me qytetarët, eprorët, kolegët dhe vartësit, punonjësi i Shërbimit Gjeologjik Shqiptar ka detyrimin të ndjekë dhe të zbatojë këto rregulla:
 - a. Komunikimi duhet të karakterizohet nga etika, mirësjellja dhe respekti i ndërsjellë. Komunikimi verbal dhe jo verbal (gjuha e trupit, gjestikulacioni, toni i zërit, mënyra e vështrimit, ruajtja e distancës fizike etj.) duhet të jetë korrekte, pa përdorur fjalor fyes apo paragjykses, për çfarëdolloj arsyeje apo shkak. Në mjediset e punës nuk mund të komunikohet me zë të lartë apo të përdoren shprehje të papërshtatshme;
 - b. Eprori nxit zhvillimin profesional të punonjësve në mënyrë të paanshme dhe gjithëpërfshirëse, përmes ofrimit të mundësive për kualifikim dhe ecuri të vazhdueshmenë karrierë;
 - c. Punonjësve të punësuar rishtazi në institucion duhet t'u krijohen kushtet e përshtatshme për ushtrimin sa më efektiv të detyrës, duke u dhënë ndihmën e duhur përmes këshillimit, orientimit, shkëmbimit të informacionit, me qëllim aftësimin e

- përshtatjen e tyre me institucionin;
- ç. Punonjësi i Shërbimit Gjeologjik Shqiptar respekton rregullat e procedurat lidhur me komunikimin e brendshëm zyrtar, me shkrim, me mjete elektronike apo verbal, duke respektuar hierarkinë dhe llogaridhënien.
 - d. Paraqitja dhe veshja e punonjësit të Shërbimit Gjeologjik Shqiptar duhet të jetë e denjë dhe serioze, në përshtatjeme funksionin që kryen. Veshja duhet të përmbushë standardet e profesionalizmit dhe modestisë, duke shmangur kështu krijimin e përshtypjes së pahijshme dhe dëmtimin e imazhit të administratës publike.
 - dh. Hyrja dhe dalja në ambientet e vendit të punës kryhet në përputhje me orarin zyrtar të përcaktuar në legjislacionin në fuqi, me përjashtim të rasteve kur, për arsye objektive, është autorizuar ndryshe;
 - e. Brenda orarit zyrtar të punës, punonjësi i Shërbimit Gjeologjik Shqiptar nuk duhet të frekuentojë ambiente të ndryshme nga ai i punës, me përjashtim të rasteve të kushtëzuara nga ushtrimi i detyrave funksionale;
 - ë. Punonjësi i Shërbimit Gjeologjik Shqiptar mund të përdorë telefonin celular privat kur nuk pengon kryerjen e detyrave. Përdorimi i tij gjatë takimeve dhe mbledhjeve të punës është i ndaluar.
 - f. Telefoni celular zyrtar duhet të përdoret nga punonjësi i Shërbimit Gjeologjik Shqiptar vetëm për arsye pune. Ai është i detyruar ta mbajë hapur atë brenda orarit zyrtar dhe gjatë ushtrimit të detyrave, me qëllim mbajtjen e komunikimit të pandërprerë.
 - g. Punonjësi që merr pjesë në një aktivitet, mbledhje apo takim pune, konferencë etj. jashtë vendit apo jashtë qytetit ku ndodhet qendra e tij e punës, informon me shkrim në rrugë protokollare eprorin direkt, titullarin e institucionit dhe Drejtorinë e Financës dhe Shërbimeve Mbështetëse, Sektori i Financës, Buxheti dhe Burimeve Njerëzore.
 - gj. Përpara zhvillimit të vizitave zyrtare e të punës jashtë shtetit, punonjësi merr miratimin paraprak të titullarit të institucionit apo të personit të autorizuar prej tij;
 - h. Punonjësi i Shërbimit Gjeologjik Shqiptar, në zbatim të detyrimit të ruajtjes dhe të mbrojtjes së pronës, mjeteve të punës, pajisjeve dhe mallrave në administrim të institucionit, si dhe të dokumentacionit zyrtar, merr masat për përdorimin e tyre vetëm për qëllime zyrtare. Në rast të keqfunksionimit të mjeteve të inventarit dhe/ose të zyrës duhet të njoftojë menjëherë eprorin e tij dhe Drejtorinë e Financës dhe Shërbimeve, Sektori i Financës, Buxheti dhe Burimeve Njerëzore.

KREU III

PËRCAKTIME TË VEÇANTA PËR DREJTORIN E PËRGJITHSHËM TË SHËRBIMIT GJEOLGJIK SHQIPTAR

Neni 10

1. Përveç sa është përcaktuar në krerët I, II, IV, V e VI, të këtij Kodi dhe/ose legjislacion tjetër specifik në fuqi, Drejtori i Përgjithshëm i Shërbimit Gjeologjik Shqiptar u nënshtrohen edhe dispozitave të këtij kreu.
2. Drejtori i Përgjithshëm i Shërbimit Gjeologjik Shqiptar realizon me ndershmëri dhe përpikëri objektivat e ngarkuar nëpërmjet sjelljes së duhur organizative, shfaq sjellje të përshtatshme dhe të paanshme, duke shërbyer si model për nëpunësit/punonjësit, si dhe nxit zbatimin e standardeve më të larta në administratën publike.
3. Drejtori i Përgjithshëm i Shërbimit Gjeologjik Shqiptar:
 - a) kujdeset që burimet, përfshirë ato njerëzore dhe financiare, që administron për shkak të detyrës, të përdoren vetëm për qëllimet për të cilat janë vënë në dispozicion, në funksion të

- realizimit të interesit publik dhe në asnjë rast për interesa personale;
- b) siguron që fondet e buxhetit të shtetit të mos përdoren për organizimin e festave për nëpunësit/punonjësit e institucionit;
 - c) siguron menaxhim efektiv dhe të përshtatshëm të institucionit që drejton, përmes vendosjes së marrëdhënieve korrekte me vartësit dhe bashkëpunëtorët;
 - ç) bën ndarje të përshtatshme dhe të duhur të detyrave, në funksion të menaxhimit efektiv të institucionit.
4. Në rast se Drejtori i Përgjithshëm i Shërbimit Gjeologjik Shqiptar bie në dijeni të një situatë paligjshmërie, që përbën shkelje disiplinore, ai ndërmerr masat e nevojshme administrative, duke e referuar çështjen pranë komisionit disiplinor. Në rast se bie në dijeni të një vepr penale, ai adreson çështjen pranë organeve kompetente pa vonesë.
 5. Drejtori i Përgjithshëm i Shërbimit Gjeologjik Shqiptar:
 - a) merr masa për mosshpërndarjen e informacioneve, lajmeve të pasakta dhe të pavërteta për organizimin, veprimtarinë, funksionimin apo nëpunësit e institucionit që drejton;
 - b) ofron, zbaton e shpërndan praktikat më të mira administrative, me qëllim rritjen e besimit të qytetarëve në institucionet publike.
 6. Drejtori i Përgjithshëm i Shërbimit Gjeologjik Shqiptar nuk mund të ushtrojë detyra të tjera të papajtueshme me funksionin publik që mban, si dhe aktivitete që ulin performancën e institucionit që drejton.
 7. Drejtori i Përgjithshëm i Shërbimit Gjeologjik Shqiptar nuk mund të japë deklarata apo të shfaqë publikisht mendime dhe opinione që bien ndesh me politikat e përgjithshme shtetërore.
 8. Përpara marrjes së detyrës, Drejtori i Përgjithshëm i Shërbimit Gjeologjik Shqiptar njofton njësinë përgjegjëse interesat privatë, që mund të përbëjnë shkak për konflikt interesash. Ai zbaton e ndjek me përpikëri legjislacionin në fuqi.
 9. Përpara zhvillimit të vizitave zyrtare dhe të punës jashtë shtetit, Drejtori i Përgjithshëm i Shërbimit Gjeologjik Shqiptar merr miratimin paraprak sipas procedurave të parashikuara nga legjislacioni në fuqi.
 10. Dispozitat e këtij kreu zbatohen edhe për personin zëvendësues të Drejtorit të Përgjithshëm, që sipas përcaktimeve të legjislacionit në fuqi është Zëvendës/Drejtori i Përgjithshëm.

KREU IV RREGULLAT E KLASIFIKIMIT TË VEPRIMTARIVE TË JASHTME

Neni 11

1. Veprimtaritë e jashtme të punonjësit e Shërbimit Gjeologjik Shqiptar janë të lejueshme vetëm kur nuk bëhen pengesë për përmbushjen e detyrave dhe të përgjegjësive zyrtare.
2. Punonjësi i Shërbimit Gjeologjik Shqiptar nuk mund të angazhohet në një veprimtari të jashtme, nëse:
 - a) ajo krijon ose duket sikur krijon një konflikt interesash me pozicionin e tij zyrtar;
 - b) angazhimi mendor e fizik i punonjësit në këtë veprimtari ndikon në kryerjen normale të detyrave të tij zyrtare, pengon ose e bën të vështirë kryerjen e tyre;
 - c) veprimtaria që kryen çënon figurën e tij, të Shërbimit Gjeologjik Shqiptar apo administratës publike;
 - ç) veprimtaria që kryen është vazhdim i detyrave të tij zyrtare dhe punonjësi duhet të përdorë të dhënat që ka nga pozicioni i tij;
 - d) qëllimi i veprimtarisë bie në kundërshtim me qëllimin dhe objektivat e pozicionit zyrtar të punës;

- dh) është një veprimtari që kryhet me kohë të plotë.
3. Nuk konsiderohet si veprimtari e jashtme e palejueshme, veprimtaria në kuadër të shoqatave kulturore, shoqërore apo sportive, pjesëmarrja në organet drejtuese të këtyre shoqatave, me përjashtim të rasteve kur kjo ndalohet shprehimisht nga ligji dhe/ose kur ajo pengon kryerjen normale të detyrës zyrtare.
 4. Në mungesë të një autorizimi, punonjësi nuk duhet të dëshmojë si ekspert përpara ndonjë trupi gjykues apo të përfaqësojë ndonjë person fizik ose juridik, vendas apo të huaj, organizatë, entitet apo qeveri të huaj, nëse Shërbimi Gjeologjik Shqiptar është palë apo ka ndonjë interes të drejtpërdrejtë dhe të rëndësishëm në çështjen që shqyrtohet.
 5. Punonjësi i Shërbimit Gjeologjik Shqiptar njofton zyrtarisht eprorin direkt dhe Drejtorisë së Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore për veprimtarinë e jashtme që do të kryejë, duke bërë një përshkrim të shkurtër të veprimtarisë, të objektivave dhe qëllimeve të organizatës, për të cilën kryen veprimtarinë e jashtme.
 6. Mbështetur në të dhënat e marra, eprori direkt, në bashkëpunim me Drejtorinë e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore, verifikon nëse veprimtaria që do të kryejë punonjësi kategorizohet si e lejueshme sipas këtij Kodi. Eprori direkt merr vendimin për përcaktimin e veprimtarisë së jashtme si të lejueshme apo jo dhe ia komunikon atë, me shkrim, punonjësit kërkuar.
 7. Ndaj vendimit të eprorit direkt mund të bëhet ankim pranë Drejtorit të Përgjithshëm të Shërbimit Gjeologjik Shqiptar, i cili merr vendim të arsyetuar.
 8. Në rastet kur punonjësi i Shërbimit Gjeologjik Shqiptar, me miratimin e titullarit/eprorit, kryen veprimtari mësimdhënieje apo trajnuese gjatë orarit zyrtar, ai është i detyruar të kompensojë orët e punës brenda javës, pas orarit zyrtar të punës.
 9. Kur punonjësi kryen veprimtari të jashtme përpara fillimit të marrëdhënieve të punës, në çastin e punësimit ai njofton me shkrim eprorin direkt dhe Drejtorinë e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore dhe merr miratimin e tyre sipas përcaktimeve të mësipërme, për të vijuar me ushtrimin e veprimtarisë së jashtme.

KREU V DHURATAT DHE FAVORET

Neni 12

1. Punonjësi i Shërbimit Gjeologjik Shqiptar nuk duhet të kërkojë apo të pranojë, në mënyrë të drejtpërdrejtë a të tërthortë, për veten, familjen, të afërmit, personat fizikë apo juridikë me të cilët ka marrëdhënie:
 - a) dhurata, favore, pritje apo çdo përfitim tjetër, si dhe premtime për to, të cilat i jepen për shkak të pozicionit të tij, me efekt përfitimi të çfarëdoshëm për dhuruesin ose persona të tretë, që ndikojnë ose duket sikur ndikojnë në paanshmërinë e kryerjes së detyrës, a janë ose duket sikur janë shpërblim për mënyrën e kryerjes së detyrës;
 - b) ftesa për pritje të ndryshme, premtime, ofrime falas apo ulje të çmimeve për kryerjen e shërbimeve, të argëtimeve, pushimeve, transporteve, udhëtimeve;
 - c) përfitime të bursave të studimit dhe/apo të sigurimeve.
2. Punonjësi i Shërbimit Gjeologjik Shqiptar nuk duhet të kërkojë, në mënyrë të drejtpërdrejtë ose të tërthortë, të japë dhurata ose të ndërmjetësojë për të dhënë dhurata për një nëpunës të një niveli më të lartë apo të afërm të tij dhe as të kërkojë ose të pranojë dhurata nga punonjësi i një niveli më të ulët ose të afërm të tij, për shkak të cilësive dhe raporteve zyrtare.
3. Një dhuratë konsiderohet e marrë në mënyrë të tërthortë kur i jepet familjes së punonjësit, të

- afermve, deri në shkallën e dytë, personave ose organizatave, me të cilat punonjësi ka pasur ose ka marrëdhënie biznesi ose lidhje politike, në bazë të kërkesës, rekomandimit apo udhëzimit të punonjësit.
4. Rregullat e përcaktuara në pikat 1, 2 dhe 3, të këtij neni, nuk zbatohen në rastin e ftesave të zakonshme apo kur janë të ftuar punonjës ose kolegë të tjerë, të mikpritjes tradicionale, dhuratave me vlerë simbolike apo tradicionale dhe të mirësjelljes, brenda kufijve normalë të traditës, zakoneve, lidhjes farefisnore dhe praktikës së përditshme, të cilat nuk krijojnë dyshime për paanësinë e punonjësit.
 5. Punonjësi i Shërbimit Gjeologjik Shqiptar mund të pranojë dhurata nga qeveritë e huaja apo organizatat ndërkombëtare, brenda kufijve normalë të shprehjes së mikpritjes dhe trajtimit që buron prejsaj, kortezisë apo protokollit, nëse nuk tejkalohen kufijtë e traditës e të zakoneve të vendit ku jepen, nuk vënë në dyshim objektivitetin, ndershmërinë dhe paanshmërinë e punonjësit e nëse nuk kompromentojnë imazhin dhe integritetin e Republikës së Shqipërisë.
 6. Punonjësi i Shërbimit Gjeologjik Shqiptar mund të mbajë dhurata të lejueshme, pa qenë i detyruar t'i deklarojë ato, nëse nuk e kalojnë vlerën prej 10.000 (dhjetëmijë) lekësh për dhuratë. Nëse punonjësi ka dyshim për vlerën e dhuratës, ai njofton eprorin direkt dhe i kërkon Drejtorisë së Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore të kryejë vlerësimin e saj.
 7. Dhuratat e pranuar nga punonjësi i Shërbimit Gjeologjik Shqiptar nga delegacione të çfarëdo natyre apo individë, mbi vlerën e caktuar, për shkak të pozicionit të tij, duhet të deklarohen brenda 30 (tridhjetë) ditëve tek eprorët, si dhe në Drejtorinë e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore bën vlerësimin e dhuratave dhe inventarizon ato me vlerë më të madhe se 10.000 (dhjetë mijë) lekë. Dhuratat administrohen në një vend të posaçëm dhe ato mund të përdoren për qëllimet veprimtarisë institucionale.
 8. Dhuratat që kanë vlera artistike, muzeore apo historike u dorëzohen institucioneve të specializuara.
 9. Në të njëjtën mënyrë administrohen edhe dhuratat që nuk mund të kthehen, sipas ligjit nr.9131, datë 8.9.2003, "*Për rregullat e etikës në administratën publike*".
 10. Në asnjë rast punonjësi nuk duhet të pranojë dhurata në vlerë monetare.
 11. Në rast se punonjësi i Shërbimit Gjeologjik Shqiptar dëshiron të mbajë dhuratën me vlerë mbi 10.000 (dhjetë mijë)lekë, atëherë ai paguan diferencën e vlerës së saj, pas vlerësimit të bërë nga institucioni.
 12. Janë të ndaluara të gjitha dhuratat që çojnë në konflikt interesi sipas legjislacionit në këtë fushë, pavarësisht vlerës së tyre.
 13. Punonjësi i Shërbimit Gjeologjik Shqiptar nuk merr përsipër dhe as bën premtime, lidhur me kryerjen ose moskryerjen e veprimeve administrative në kompetencë të tij ose të kolegëve, që mund të përbëjnë shkak për njëanshmëri gjatë ushtrimit të detyrave.

KREU VI KËSHILLIMI, TRAJNIMI DHE DISIPLINA PËR ZBATIMI E RREGULLAVE TË ETIKËS

Neni 13 Këshillimi dhe informimi

1. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore është përgjegjës për këshillimin e çdo punonjësi të Shërbimit Gjeologjik Shqiptar për detyrimet që burojnë nga legjislacioninë fuqi për standardet e sjelljes etike.

2. Me qëllim mbajtjen të informuar të punonjësve të Shërbimit Gjeologjik Shqiptar, Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore, realizon këshillime dhe informime periodike për çështje të rregullave të etikës.
3. Informimi për standardet e sjelljes etike ofrohet nga Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore.
 - a) në momentin e fillimit të punës, përmes njohjes me legjislacionin përkatës në fuqi për etikën;
 - b) rast pas rasti, nëse ka ndryshime të akteve ligjore dhe nënligjore për etikën.
4. Këshillimi periodik realizohet:
 - a) Nëpërmjet email-ve informuese, mbledhjeve dhe/apo sesioneve të shkurtra me qëllim përditësimin e nëpunësve/punonjësve për situata apo raste që kanë të bëjnë me rregullat e etikës.
 - b) Mbi bazën e rasteve konkrete, nga praktika administrative në Shqipëri, në vende të tjera apo në organizata ndërkombëtare. Këto raste mund të jepen në mënyrë individuale apo si përgjithësim i praktikës administrative.
5. Për realizimin e procesit të informimit dhe këshillimit periodik, Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore realizon me punonjësit e Shërbimit Gjeologjik Shqiptar, në mënyrë periodike sesione trajnuese për problematikat e shfaqura në lidhje me rregullat e etikës dhe zgjidhjen e tyre.
6. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore kujdeset që gjatë procesit të informimit dhe këshillimit periodik, të dhënat të jepen në mënyrë të anonimizuar duke shmangur identifikimin e nëpunësve /punonjësve, si edhe të institucioneve të përfshirë në këtë proces.
7. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore raporton në mënyrë periodike, në Departamentin e Administratës Publike, rastet dhe situatat që kanë të bëjnë me mënyrën e zbatimit të rregullave të etikës, si edhe zgjidhjen e dhënë.
8. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore, për raste të veçanta, këshillohet edhe me Departamentin e Administratës Publike.
9. Në rast se punonjësi i Shërbimit Gjeologjik Shqiptar gjatë realizimit të detyrave të tij funksionale ka dyshime se sjellja, veprimi dhe/apo mosveprimi i tij, mund të vijë në kundërshtim me rregullat e etikës, ai ka të drejtë t'i drejtohet Drejtorisë së Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore e cila duhet ta këshillojë dhe informojë punonjësin për sjelljen, veprimin apo mosveprimin që duhet të kryejë.
10. Për situata apo raste tepër të dyshimta dhe të patrajtuara më parë, Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore mund të kërkojë ndihmën e Departamentit të Administratës Publike. Këshillimi mund të kërkohet dhe nga eprori për sjellje, veprime apo mosveprime të punonjësit, nëse mendon se vijnë në kundërshtim me rregullat e etikës.

Neni 14 Mbikqyrja

1. Mbikqyrja e zbatimit të rregullave të etikës realizohet nga eprori direkt dhe nga Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore.
2. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore merr informacion në mënyrë të vazhdueshme për çështjet që kanë të bëjnë me rregullat e etikës në institucion dhe ia raporton rregullisht eprorit të punonjësit, Drejtorit të Përgjithshëm të institucionit, Departamentit të Administratës Publike për marrjen e masave përkatëse.
3. Eprori i punonjësit në rast se gjatë veprimtarisë së përditshme vëren shkelje apo problematika

në zbatimin e rregullave të etikës, përveç masave që mund të marrë vetë, informon dhe Drejtorinë e Financës dhe Shërbimeve Mbështetëse, Sektorin e Financës, Buxhetit dhe Burimeve Njerëzore.

Neni 15 **Disiplina**

1. Procedura disiplinore në kuadër të shkeljes së rregullave të etikës për:
 - a) nëpunësit civilë rregullohet sipas legjislacionit në fuqi për nëpunësin civil;
 - b) nëpunësit e tjerë jashtë shërbimi civil rregullohet sipas legjislacionit përkatës që gjen zbatim për marrëdhënien e tyre të punës.
2. Masat disiplinore ndaj punonjësve të Shërbimit Gjeologjik Shqiptar jepen nga organet kompetente, sipas legjislacionit respektiv.
3. Moszbatimi i parashikimeve të këtij Kodi përbën shkak për fillimin e procedimit disiplinor.
4. Masat disiplinore për shkelje të rregullave të etikës bëhen pjesë e dosjes personale të punonjësit të Shërbimit Gjeologjik Shqiptar dhe hidhen në Regjistrin Qendror të Personelit, të administruar nga Departamenti i Administratës Publike.
5. Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore ka detyrimin e hedhjes së masave disiplinore në Regjistrin Qendror të Personelit brenda 10 (dhjetë) ditëve nga marrja e saj.
6. Masat disiplinore për punonjësit e Shërbimit Gjeologjik Shqiptar shuhet pas kalimit të afateve të përcaktuara në legjislacionin e tyre respektiv.
7. Masa disiplinore e shuar fshihet nga dosja e personelit dhe hiqet menjëherë nga Regjistri Qendror i Personelit prej Drejtorisë së Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore.

KREU VII **DISPOZITA KALIMTARE**

1. Ngarkohet Drejtoria e Financës dhe Shërbimeve Mbështetëse, Sektori i Financës, Buxhetit dhe Burimeve Njerëzore, të njoftojnë gjithë punonjësit e Shërbimit Gjeologjik Shqiptar për miratimin e Kodit të Etikës dhe të sigurohet për publikimin në faqen zyrtare të institucionit.
2. Ngarkohen të gjithë punonjësit e Shërbimit Gjeologjik Shqiptar për zbatimin e përcaktimeve të këtij Kodi.

Miratuar me Urdhërin Nr. 11 datë 13/06/2022 të Drejtorit të Përgjithshëm të Shërbimit Gjeologjik Shqiptar.